

पावलसे कलस्सीला विश्वासीगदेदा भ्रिबा चिठी

चु चिठीला बारेरी पाङ्तोःमा

भ्रिबा म्हि: येशूला मुल चेला पावलसे भ्रिबा मुबा। चु चिठी भ्रिबाला
लागिरी पावलदा तिमोथी भ्रिबा म्हिसे हो लबा मुबा (कलस्सी १:१)।

भ्रिबा ग्ला: रोम शहरला भ्याल्खानग्याम भ्रिबा मुबा।

भ्रिबा साल: ओस्पन ईश्वी संवत् ६१-६३ (विक्रम संवत् ११८-१२०)
सालला गुडरी भ्रिबा मुबा।

खाल्दा भ्रिबा: कलस्सी शहररी मुबा विश्वासीगदेदा भ्रिबा मुबा।

कलस्सी भ्रिबा शहर एफिसस भ्रिबा शहरला स्यारपट्टि परब तबा एशिया
अञ्चलला शहर गिक मुबा। चु मण्डली पावलसे शुरु लबा मण्डली चा आहिन,
तसैनोन चु शहर थे बास चिबा ग्लाला डामरीन मुबासे लमा डाइ हो लतोःला
भिसी थेसे म्हन्बा मुबा। चु मण्डलीरी प्रभुला गे लबाला लागिरी पावलसे
एफिसस शहरग्याम म्हिगदे पुइबा मुबा। कलस्सीला मण्डलीरी लुसीला
ताम लोण्बा म्हिगदेसे परमेश्वरदा डोसेबाला लागिरीदेन थार्बा याङ्बाला
लागिरी स्थान्दो आत्मादेन शक्तिगदेदा तेन्तोःला भिसी पाङ्मुबा। चु ताम
पावलदाएनोन था मुबा। चु तामगदे बाहेक थे लुसीला ताम लोण्बा म्हिगदेसे
खतना लतोःला, ओच्छे चबा थुङ्बादेन अर्गु तामगदेलाएनोन ठिम अन्छार
लतोःला भिसी लोप्मुबा।

पावलसे कलस्सीला विश्वासीगदेदा थेहङ्बा लुसीला तामला बिरोध चा
सत्य विश्वासग्याम लतोःला भिसी चिठी भ्रिबा मुबा। थेसे भ्रिबा चु चिठीला

मुल ताम चा येशू ख्रीष्टसे पूरान थाना लखम्ला, ओच्छे अर्गु तामदेन ठिमसे चा म्हिगदेदा ख्रीष्टग्याम थारेड तना लमुला। परमेश्वरसे जम्बुलिङला म्हिगदे येशूग्यामसेन स्होजी ओच्छे येशूग्यामनोन थेनीगदेदा ह्वाङ मुबा ग्लारी भजी। थेतबासेलमा येशू ख्रीष्टग्याम जे जम्बुलिङला जम्मान म्हिगदेसे थारबा याङ्ला। ओच्छे पावलसे जम्मान विश्वासीगदेदा विश्वासरी भ्रबाला लागिरी तोःबा जम्मान तामगदे घोना लबा मुला।

चु चिठी तुखिकस भिबा म्हिसे कलस्सी शहररी भोर्सी निबा मुबा। ओच्छे थेदेन छ्याम फिलेमोनना नोकर ओनेसिमसएनोन निबा मुबा। थेला लागिरी पावलसे फिलेमोनदा चिठीएनोन भिबा मुबा।

मुल तामगदे

- फ्याफुल्बादेन प्रार्थना १:१-१४
- ख्रीष्ट जम्मान भन्दा घेन १:१५-२:१६
- ख्रीष्टदेन छ्याम गिक तसी याङ्बा छार जुनी २:२०-४:६
- चिठीला थुमरी भिबा ताम ४:७-१८

पावलसे कलस्सीला विश्वासीगदेदा भिबा चिठी

१ १-२ लास्सो, कलस्सेरी मुबा परमेश्वरला म्हिगदेदा परमेश्वरसे ह्वाडला समाचार थे:ना लबारी धम्बा डा ख्रीष्ट येशूला मुल चेला पावलदेन य्हाडला आले तिमोथीग्याम फ्याफुल्ला! थेरी मुबा परमेश्वरला म्हिगदे ख्रीष्टदेन छ्याम गिक तबा विश्वासी ज्योज्यो आले नाना आडागदेदा य्हाडला परमेश्वर आबादेन ख्रीष्ट प्रभुग्याम दयामायादेन शान्ति तगै।

धन्यवाददेन प्रार्थना

३ डन्से एनीगदेला लागिरी प्रार्थना लबा धुइरी य्हाडला प्रभु येशू ख्रीष्टला आबा परमेश्वरदा सदन धन्यवाद पिन्बा मुला। ४ तिगदा भिसम एनीगदेसे ख्रीष्ट येशूदा विश्वास लबा तामदेन परमेश्वरला जम्मान म्हिगदे न्हडरी माया लसी ढिकसी चिबा मुला भिबा ताम डन्से थे:बा मुला। ५ परमेश्वरसे स्वर्गरी एनीगदेला लागिरी जुकजुकधोनाला

जुनी थान्बा मुला भिसी एनीगदेसे आश लबा मुला। थेतबासेलमा एनीगदे चुहङ् लसी विश्वास लसी ह्वाड ह्वाड न्हडरी माया लसी ढिकसी चिबा हिन्ना। एनीगदेसे लबा आशला तामला बारेरी एनीगदेसे डाच्छान थार्बा पिन्बा समाचार सत्य बचनग्याम थे:बा मुला। ६ चुनोन थार्बा पिन्बा समाचार थे:सी, परमेश्वरला दयामायाला बारेरी सत्य ताम ज्यना लसी घोमाकुनुहेन्से एनीगदे न्हडरी ख्रीष्टदा विश्वास लबा म्हिगदे बढब तबा मुला। थेहङ् लसीन जम्बुलिडला जम्मान ग्लारी थार्बा पिन्बा समाचार थे:सी ख्रीष्टदा विश्वास लबा म्हिगदे बढब तबान मुला। ७ चु थार्बा पिन्बा समाचार एनीगदेसे डन्से माया लबा हो इपाफ्रासग्यामसेन था याङ्सी जिन्बा मुला। थे डन्देन छ्यामनोन ढिकसी गे लमुला। थेतबासेलमा डन्ना साटोरी थेसे एनीगदेला गुडरीनोन सेमहेन्सेन ख्रीष्टला गे लबा विश्वास लखम्बा

म्हि हिन्ना। * ८ओच्छे परमेश्वरला आत्माग्याम एनीगदेसे हाड हाड न्हडरी लबा मायाला बारेरी थेसे डन्दा पाङ्बा मुला।

९थेतबासेलमा चु ताम थे:माकुनुहेन्से डन्से एनीगदेला लागिरी प्रार्थना लबारी ख्लाबा आरे। परमेश्वरला आत्मासे पिन्बा ज्ञान बुद्धिग्याम एनीगदेसे तिग लगै भिसी परमेश्वरसे म्हन्बा मुला, थे जम्मान ताम ज्यना लसी घोबारी खम्मै भिसी बिन्ती लबा मुला। १०थेहङ् लसीन एनीगदेसे प्रभुदा सेम निबा बानीबेहोर थोसी सदन ज्यबा गे लखम्मै। एनीगदेला थेहङ्बा गेग्याम प्रभु ताङ्गै। ओच्छे परमेश्वरला बारेरी भन ज्यना लसी घोखम्मै। ११एनीगदेदा जस्तोन दुख तसैनोन ताङ्सी ताङ्सी नाबाला लागिरी परमेश्वरला घेन शक्ति याङ्सी भङ्सी चिउ। १२परमेश्वरसे यहाल यहाल्बा यहुल्सारी चिबा हाडला म्हिगदेदा पिन्बा हक एनीगदेदाएनोन पिन्बा मुला। थेतबासेलमा थेहङ्बा हक पिन्बा परमेश्वर आबादा सदन धन्यवाद पिन्गो। १३थेनोन परमेश्वरसे यहाडदा शैतानना धोपधोप्बा यहुल्साग्याम फेसी हाडसेन माया लबा भा ख्रीष्टला यहुल्सारी भसी थान्जी। १४ख्रीष्टसेन यहाडला पापला दोष मेटब लसी यहाडदा पापग्याम फेबा मुला। *

जम्मान भन्दा घेन ख्रीष्टनोन हिन्ना

१५खालैसेन म्राङ् आखम्बा परमेश्वरला रुप ख्रीष्टनोन हिन्ना। थे परमेश्वरसे स्होबा जम्मान स्हे भन्दा डाच्छाहेन्सेन मुबा। थेतबासेलमा परमेश्वरसे स्होबा जम्मान स्हे भन्दा घेन ख्रीष्टनोन हिन्ना। १६तिगदा भिसम स्वर्गदेन जम्बुलिडरी मुबा म्राङ्खम्बा म्राङ् आखम्बा जम्मान स्हेगदे, ग्लेगदे मुसै, यहुल्सागदे मुसै, शासन लबागदे मुसै, अधिकार याङ्बागदे मुसै परमेश्वरसे ख्रीष्टग्याम स्होबा हिन्ना। ओच्छे परमेश्वरसे चु जम्मान ख्रीष्टलान लागिरी स्होबा हिन्ना। १७जम्मान स्हे स्होबा भन्दा डाच्छाहेन्सेन ख्रीष्ट मुबा। थेतबासेलमा जम्मान स्हेगदे ख्रीष्ट येशूरीन छ्याबा मुला। १८ख्रीष्ट हाडला लहुइ मण्डलीला थोबो हिन्ना। ओच्छे लहुइला मुल हङ्बा जम्मान स्हेला मुल थेनोन हिन्ना। थेहङ् लसीन सिबागदे न्हङ्ग्याम जम्मान भन्दा डाच्छा सोबाएनोन ख्रीष्टनोन हिन्ना। थेतबासेलमा जम्मान स्हेगदे भन्दा घेन ख्रीष्टनोन हिन्ना। * १९परमेश्वरसे म्हन्बा अन्छार परमेश्वर हाडनोन थेला भा ख्रीष्ट न्हडरी तसी धन्छ्याबा मुला। २०हाडला भा ख्रीष्ट कुसरी सिसी बगब लबा काग्यामसेन परमेश्वरसे स्वर्गदेन जम्बुलिडरी मुबा जम्मान स्हेदा शान्ति पिन्जी। ओच्छे

ख्रीष्टग्यामसे जम्मान स्हेदा हाडलान
स्होजी।*

२१ डाच्छा एनीगदेला पापी सेमदेन
पाप गेसे लमा एनीगदे परमेश्वरला
शत्रु मुबा। थेतबासेलमान थे धुइरी
एनीगदे परमेश्वरग्याम थारेड मुबा।
२२ तर दान्दे परमेश्वरसे म्हन्बा अन्छार
परमेश्वरला भा म्हि दोसी सिजी।
चुग्यामसेन परमेश्वरसे एनीगदेदा
हाडला ह्योदेन तिगै दोष आरेबा चोखो
म्हि स्होसी हाडला डामरी भबारी
हिन्ना। २३ थेतबासेलमा एनीगदेसे
लबा विश्वास आख्लाना विश्वासरी
कोइसी चिउ। ओच्छे एनीगदेसे थार्बा
पिन्बा समाचार थे:बा धुइरी याड्बा
आशदा थाम्ले:गो। तिग्दा भिसम
चु समाचार जम्बुलिङला जम्मासेन
थे:सी जिन्बा मुला। थेतबासेलमा डा
पावलएनोन चुनोन समाचार थे:ना
लबा म्हि दोबा मुला।

मण्डलीला लागिरी पावलसे लबा गे

२४ दान्दे एनीगदेला लागिरी दुख
नातो:सै डा ताड्बा मुला। तिग्दा
भिसम डाइ ख्रीष्टसे नाबा हड्बा दुख
अभ नातो:सेला मुला। थेतबासेलमा
थेला ल्हुइ मण्डलीला लागिरी
डाइ नातो:बा जम्मान दुख नाला।
२५ परमेश्वरसे थेला मण्डलीरी गे
लबा जिम्मा डादा पिन्बा मुला।

डादा पिन्बा जिम्मा चा एनीगदेला
लागिरी परमेश्वरला समाचार पूरान
थे:ना लबा हिन्ना। २६ चु दडबोहेन्सेन
खालैसे घोबारी आखम्बा परमेश्वरला
सेमला ताम हिन्ना। तर दान्दे चु
परमेश्वरसेन हाडला म्हिगदेदा घोना
लबा मुला। २७ म्हिसे था आयाड्बा
परमेश्वरला सेमला ताम अर्गु य्हुलला
म्हिगदेला लागिरी गाते उदेकला मुबा
भिबा ताम घोना लबारी थेनीगदेदा
धम्बा हिन्ना। थे परमेश्वरला सेमला
ताम चा एनीगदेला सेमरी मुबा ख्रीष्ट
हिन्ना। ओच्छे एनीगदेसे परमेश्वरदेन
छ्यामनोन चिम्याङ्ला भिसी लबा
आश हिन्ना।

२८ थेतबासेलमा डन्से जम्मान
म्हिगदेदा ख्रीष्टला बारेरी पाड्बा
मुला। ओच्छे ख्रीष्टदेन छ्याम
गिक तबागदेदा पाको म्हि स्होसी
परमेश्वरला डामरी भोर्बाला लागिरी
थेनीगदेदा डन्ना ज्ञान बुद्धिसे
खम्तेधोना लोप्सी होशियार तना लबा
मुला। २९ चुला लागिरी डा न्हडरी मुबा
ख्रीष्टला घेन शक्तिग्याम डाइ दुख
लसी चु गे लबा हिन्ना।

२ एनीगदेदेन लाउडिकिया भिबा
शहररी मुबा विश्वासीगदेला
लागिरी ओच्छे डादेन छ्याम हुप
आतबा म्हिगदेला लागिरी डाइ गाते
दुख लसी गे लबा मुला भिबा ताम
एनीगदेसे था याङ्गै। २ डाइ चुहङ्

लसी गे लबा चा एनीगदेसे आँट
याङ्सी हाड हाड न्हडरी माया
लसी ढिक्सी चिखम्मौ भिसी हिन्ना।
ओच्छे एनीगदेसे परमेश्वरला बचन
पूरान घोसी परमेश्वरला सेमला
ताम ख्रीष्टदा ज्यना लसी डोसेगै,
घोगै भिसीएनोन हिन्ना। ३५हाडदा
आरेनान आतबा परमेश्वरला ज्ञान
बुद्धि ख्रीष्टदेन छ्याम जे मुला।
४थेतबासेलमा खालैसेन एनीगदेदा
लुसीला ताम लोप्सी भुक्क्याब लबारी
थाखम्मौ भिसी चु ताम डाइ एनीगदेदा
पाङ्बा हिन्ना। ५डा लहुइरी एनीगदेदेन
छ्याम आरेसै डाला सेम मी सदन
एनीगदेदेन छ्यामनोन मुला। ओच्छे
एनीगदेला बानीबेहोरदेन ख्रीष्टदा
लबा विश्वासरी एनीगदे कोङ्सी
चिबा म्राङ्सी डा ल्हानान ताङ्बा
मुला।

थार्बा पिन्बा ख्रीष्टनोन हिन्ना

६थेतबासेलमा एनीगदेसे ख्रीष्ट
येशूदा प्रभु भिसी विश्वास लबासे
लमा सदन ख्रीष्टदेन छ्याम गिक
तसी भ्रउ। ७डाच्छा एनीगदेदा लोप्बा
अन्छार विश्वासरी अफ कोङ्बान
निउ। थेहङ् लसीन ख्रीष्टदा लबा
विश्वासरी याङयोङ आतना ख्रीष्टदेन
छ्याम गिक तसी विश्वासरी बढब
तबान निउ। ओच्छे परमेश्वरदा सदन
धन्यवाद पिन्गो।

८च्यागो, एनीगदेदा खालै म्हिसे
थेनीगदे हाड हाडसे म्हन्सी लोप्बा गे
आखेल्ला लुसीला ताम लोप्सी फसब
थालगै। तिगदा भिसम चु जम्मान ताम
जम्बुलिङदेन मुरी मुबा म्हङ म्हुङ,
ल लुग्याम खबा ताम हिन्ना। तर
ख्रीष्टग्याम खबा आहिन।

९ख्रीष्ट म्हि दोसी फेप्खसै
थेनोन परमेश्वर हिन्ना। १०एनीगदे
ख्रीष्टरी गिक तबासे लमा एनीगदेसे
पूरा थार्बा याङ्बा मुला। ओच्छे
जम्मान शक्तिगदेदेन अधिकार
याङ्बागदेथोरी शासन लबाएनोन
ख्रीष्टनोन हिन्ना। ११ख्रीष्ट येशूदेन
छ्याम गिक तबासे लमा एनीगदे
खतना लबा म्हि हङ्बान दोबा
मुला। तर यहूदीगदेला ठिम अन्छार
एनीगदेला लहुइला तिगै स्हे थासी
आहिन। तर ख्रीष्ट येशूसे एनीगदेला
पापी बानीबेहोर भ्याङ्सी खतना
लबा हिन्ना। १२तिगदा भिसम
बप्तिस्मा किन्मा एनीगदे ख्रीष्टदेन
छ्यामनोन लहुबा मुबा। ओच्छे
परमेश्वरला शक्तिसे ख्रीष्टदा
सिबाग्याम सोना लबा हिन्ना,
थेनोन शक्तिथोरी विश्वास लबासे
लमा एनीगदेदाएनोन ख्रीष्टदेन
छ्यामनोन सोना लबा मुला।*
१३डाच्छा एनीगदे हाङला पापदेन
पापी बानीबेहोर आख्लाबासे लमा
एनीगदे सिबा तेबान मुबा। तर दान्दे

परमेश्वरसे यहाङ जम्मालान पाप माफ लसी ख्रीष्टदेन छ्यामनोन सोना लबा मुला। * १४ यहाङला आज्यबा गेसे लमा परमेश्वरसे मोशादा पिन्बा ठिम अन्छार याङतोःबा सजायदा परमेश्वरसे कुसरी खिल ठोक्सी नाश लजी। * १५ चुहङ लसी ख्रीष्ट कुसरी सिसी जम्मान शक्तिगदेदेन अधिकार याङ्बागदेदा भ्रेना लजी। ओच्छे थेनीगदेदा जम्मालान ओन्छाङरी पेःना लजी।

१६ थेतबासेलमा एनीगदेदा खालै म्हिसे तिग चबा थुङ्बा लबा चीम, खाहङ्बा खाहङ्बा चाङ धङ्बा चीम, औंसी धङ्बा चीम कि धङ्बा चीम ओच्छे बलपबा न्हबा धिन धङ्बा चीम कि धङ्बा चीम भिसी दोष थालगै। * १७ चु जम्मान ठिमगदे चा सत्य तामला चिनु जे हिन्ना। थे सत्य ताम भिबा चा ख्रीष्टनोन हिन्ना। १८ एनीगदेदा खालैसे लुसीला ताम लोप्सी फसब थालगै। तिगदा भिसम थेहङ्बा म्हिगदेसे एनीगदेदा फसब लबारी यहाङ तिगै आहिन, यहाङसे स्वर्गदूतगदेदा तेन्तोःला भिसी लोप्मुला। चु जम्मान ताम डन्दा परमेश्वरसे उन्बा हिन्ना भिसी थेनीगदेसे पाङ्सैनोन थेन्ना सेमरी म्हन्सी लोप्बा ताम जे हिन्ना। थेतबासेलमा एनीगदेसे थेनीगदेला ताम ड्यान्जी भिसम एनीगदेसे

याङतोःबा इनाम आयाङ्। थेनीगदेसे हाङला सेमरी म्हन्सी लोप्बा तामरी घमण्ड लसी भ्रमुला। तर थेनीगदेसे घमण्ड लतोःबा ताम तिगै आरे। १९ थेहङ्बा म्हिगदे चा हाङला लहुङला थोबो हङ्बा ख्रीष्टदेन छ्याम आचिना, फेसी चिमुला। ख्रीष्टदेन छ्याम गिक तसी चिजी भिसम जे यहाङला लहुङला जोर्नी जोर्नीरी भङ वाङ्सी परमेश्वरसे म्हन्बा अन्छार यहाङ लहेबान निला। *

२० एनीगदे ख्रीष्टदेन छ्यामनोन सिसी जम्बुलिङदेन मुरी शासन लबा म्हङ म्हुङदेन ल लुग्याम फेसी जिन्बा मुला। चुदे एनीगदे फेसी जिन्बा हिन्सम जम्बुलिङरी चिबा हङ लसी थेहङ्बा ठिमदा तिगदा ख्लाबारी आखम्बा? ओच्छे अभ तिगदा थेहङ्बा ठिमला लिच्छा भ्रबा? २१ ओच्छे अभ तिगदा चु लबारी आत, चु चबारी आत, चु थुर्बारी आत भिसी पाङ्सी भ्रबा? २२ चु जम्मान तामगदे चा यहाङसे लना लनान म्हासी निबा ताम हिन्ना। तिगदा भिसम चु तामगदे चा म्हिगदेसे स्थान्दो म्हिदा कुल्बारीदेन लोप्बारी स्होबा ठिम जे हिन्ना। २३ थेहङ्बा रिमठिम तेन्बा म्हिगदेसे चा “डनी धर्म कर्म लबा सोजो म्हि हिन्ना” भिसी ल्हानान सेबा दोसी

हाडला लहुइदा दुख पिन्मुला। तर
थेनीगदेसे हाडला पापी सेमदा चा
तहरी थान्बारी आखम्मुला।

परमेश्वरदा सेम निबा बानीबेहोर

३ एनीगदे ख्रीष्टदेन छ्यामनोन
सिबाग्याम सोबा मुला।
थेतबासेलमा स्वर्गरी मुबा स्हेगदे
म्हाइगो। थेनोन स्वर्गरी परमेश्वरला
दाहिने छ्यापट्टि मुल ठिरी ख्रीष्ट
धन्छ्यामुला।* २एनीगदेसे जम्बुलिङ-
री मुबा तामगदेला बारेरी आहिन तर
स्वर्गरी मुबा तामगदेला बारेरी म्हन्नो।
३तिगदा भिसम एनीगदे ख्रीष्टदेन
छ्यामनोन सिबा मुला। ओच्छे
एनीगदेला जुनी ख्रीष्टदेन छ्याम
परमेश्वर मुबा ग्लारी थान्बा मुला।
४ओच्छे एनीगदेला जुनी ख्रीष्टनोन
हिन्ना। थेतबासेलमा ख्रीष्ट दोःसी
फेप्खबा धुइरी थेला घेन य्हालदेन
शक्तिरी एनीगदेएनोन थेदेन छ्यामनोन
तला।

५थेतबासेलमा एनीगदेसे जम्बुलिङ-
री लबा आज्यबा बानीबेहोर ख्लागो।
थेहङ्बा आज्यबा बानीबेहोर भिबा
चा स्थहान्दोदेन छ्याम ब्रेल्सी भ्रबा,
स्थहान्दोदेन छ्याम ब्रेल्बा सेम लबा,
पापी सेम थोबा, आज्यबा ताम
म्हन्बादेन लोभ लबा हिन्ना। लोभ

लबा चा मूर्तिदा परमेश्वर भिसी तेन्बा
हिन्ना। ६थेहङ्बा गेगदेसे लमान
परमेश्वर थेनीगदे म्राङ्सी बोमो खबा
मुला ओच्छे परमेश्वरसे कुल्बा ताम
आङ्यान्बा। ७थेहङ्बा म्हिगदेदा
थेसे सजाय पिन्ना। ८डाच्छा मी
एनीगदेएनोन थेहङ्बा तामला लिच्छा
भ्रमुबा।

९तर दाहेन्से एनीगदेसे म्हिदा
बोमो लबा, म्हिदा बिरोध लबा,
स्थहान्दोला बेइज्जत लबा, नइबा
ताम लबा चु जम्मान आज्यबा ताम
ख्लागो। १०ओच्छे खालैदेन एनीगदेसे
लुसीला ताम थालउ। तिगदा भिसम
एनीगदेसे डाच्छाला जम्मान आज्यबा
बानीबेहोर ख्लासी जिन्बा मुला।*
१०दाहेन्से परमेश्वरसे एनीगदेदा
छार जुनी पिन्बासे लमा एनीगदेसे
परमेश्वरदा ज्यना लसी डोसेगै भिसी
अभन परमेश्वरसे एनीगदेदा हाड
हङ्बान स्होबान मुला।* ११छार
म्हि दोमाहेन्से अर्गु य्हुलला म्हि मुसै,
यहूदी मुसै, खतना लसै आलसै,
पढब लबारी आसेसै, बानीबेहोर
आरेसै नोकर मुसै मालिक मुसै
तिगै घेन ताम आहिन। तर ख्रीष्टसे
जम्मानथोरी शासन लबादेन ख्रीष्ट
य्हाड जम्मानदेन छ्याम तबा चा घेन
ताम हिन्ना।

३:६ परमेश्वरसे कुल्बा ताम आङ्यान्बागदेदा भिबा ताम चा कोइ ग्रीक बाइबलरी मुला कोइ
ग्रीक बाइबलरी आरे।

३:१ भजन ११०:१ ३:६ एफि ४:२२ ३:१० उत्प १:२६; एफि ४:२४

१२ हाडलान म्हिगदे स्होबारी परमेश्वरसे माया लसी एनीगदेदा धम्बा हिन्ना। थेतबासेलमा एनीगदे सेमहेन्सेन दया लबा, दुख नाखम्बादेन घेन म्हि आदोना सोजो म्हि दोसी भ्रउ।* १३ ओच्छे एनीगदे हाड हाड न्हडरी सेम नासी चिउ। खालैसे एनीगदेदा बिरोध लसम प्रभुसे एनीगदेदा माफ लबा हङ् लसी थेनीगदेदा एनोन माफ लउ।* १४ चु जम्मान तामगदे भन्दा घेन चा एनीगदे न्हडरी लबा माया हिन्ना। तिगदा भिसम जम्मान स्हेदा गिक स्होबा चा माया हिन्ना। १५ ओच्छे ख्रीष्टसे पिन्बा शान्तिसे एनीगदेला सेम न्हडरी सदन गे लगै। चुनोन शान्तिला लागिरी परमेश्वरसे एनीगदेदा ख्रीष्टग्याम ल्हुइ गिक हङ्बान स्होसी ड्योइबा हिन्ना। ओच्छे सदन परमेश्वरदा धन्यवाद पिन्गो। १६ एनीगदेला सेम सदन ख्रीष्टला बचनसे प्लिङ्सी गिकसेम गिकदा हाडला जम्मान ज्ञान बुद्धिसे लोप्गो। ओच्छे परमेश्वरला आत्मासे पिन्बा व्हाइ सेमहेन्से गोसी परमेश्वरदा धन्यवाद पिन्गो। १७ एनीगदेसे खजिबै गेदेन ताम लसै प्रभु येशूला मिनग्यामसेन लउ। ओच्छे प्रभु येशूग्यामसेन परमेश्वर आबादा धन्यवाद पिन्गो।*

ख्रीष्टदा विश्वास लबागदेसे लतो:बा ताम

१८ जम्मान मिडम्हेमेगदे हाड हाडला हेम्बोला तहरी चिउ। तिगदा भिसम चु प्रभुदा सेम निबा ताम हिन्ना।* १९ ओच्छे जम्मान हेम्फेबेगदेसेनोन हाड हाडला मिडदा आज्यबा व्यवहार आलना माया लउ।* २० कोलागदे, एनीगदेसे हाडला आबा आमासे कुल्बा जम्मान ताम ड्यान्गो। चुहङ् लसम परमेश्वर ताङ्गला।* २१ थेहङ् लसीन आबागदेसेनोन हाड हाडला कोलागदेदा बोमो खना थालउ। बोमो खना लजी भिसम थेनीगदेला सेम स्हु खला।* २२ नोकरगदे, एनीगदेसे जम्बुलिङरी मुबा हाड हाडला मालिकगदेदा ताङ्गना लबारी थेनीगदेला डाच्छा जे गे लबा आहिन। तर प्रभुदा मान लबा हङ् लसी एनीगदेला मालिकदा एनोन मान लउ। ओच्छे एनीगदेसे सदन थेनीगदेसे कुल्बा ताम ड्यान्गो। ओच्छे हाडला सेमहेन्से गे लउ।* २३ ओच्छे एनीगदेसे जुन गे लसै म्हिला लागिरी गे लबा हङ् लसी आहिन, तर प्रभुला लागिरी गे लबा हङ् लसी सेमहेन्सेन भन्सी गे लउ। २४ तिगदा

३:१२-१३ एफि ४:२ ३:१३ एफि ४:३२ ३:१६-१७ एफि ५:१६-२०

३:१८ एफि ५:२२; १ पत्रु ३:१ ३:१६ एफि ५:२५; १ पत्रु ३:७ ३:२० एफि ६:१

३:२१ एफि ६:४ ३:२२-२५ एफि ६:५-८

भिसम प्रभुसे हाडला म्हिगदेदा इनाम
पिन्ना भिसी लबा कबुल एनीगदेदा
थानोन मुला। ओच्छे एनीगदेसे तेन्बा
प्रभु चा ख्रीष्ट जे हिन्ना। ^{२५}जुन म्हिसे
आज्यबा गे लला थेसे लबा आज्यबा
गेला सजाय याङ्गोन याङ्गला। तिगदा
भिसम परमेश्वरसे खालैला ली
आच्याना निसाफ लला।*

✕ मालिकगदे, एनीगदेसेनोन
हाडला नोकरगदे न्हडरी
खालैला ली आच्याना ज्यना लउ।
ओच्छे एनीगदेसेनोन हाडला मालिक
स्वर्गरी मुला भिबा ताम थाम्ले:गो।*

ख्रीष्टियानगदेसे लतो:बा ताम

^२एनीगदे सदन परमेश्वरदा धन्यवाद
पिन्बान भन्सी प्रार्थना लसी चिउ।
^३एनीगदेसे प्रार्थना लबा धुइरी अभ
ख्रीष्टला बारेरी परमेश्वरला सेमरी
मुबा ताम म्हिगदेदा थे:ना लबारी
परमेश्वरसेन ग्याम स्होसी पिन्नौ भिसी
डन्ना लागिरी प्रार्थना लसी पिन्नो।
ख्रीष्टला समाचार थे:ना लबासे लमान
दान्दे डा भ्याल्खानरी परब तबा
हिन्ना। ^४ओच्छे डाइ घोना लतो:बा चु
ताम ज्यना लसी घोना लबारी खम्मौ।

^५ख्रीष्टदा विश्वास आलबा म्हिदेन
छ्याम होस लसी ज्यबा व्यवहार
लउ। ओच्छे एनीगदेसे याङ्गला खजिबै

मौका स्योर्ना थालउ।* ^६थेतबासेलमा
एनीगदेसे पाङ्बा ताम म्हिगदेदा
डुयान्गे म्हन्बा खाल्ला तगै। ओच्छे
म्हिगदेदेन छ्याम ताम लमा खाहङ्
लसी जोहाब पिन्तो:ला भिसी घोउ।

^७डन्से माया लबा आले तुखिकससेन
एनीगदेदा डाला बारेरी जम्मान ताम
पाङ्गला। थेएनोन डन्देन छ्यामनोन
प्रभुला गे लबा विश्वास लखम्बा म्हि
हिन्ना।* ^८डाइ थेदा एनीगदे मुबा ग्लारी
पुइखबा चा थेसे डन्ना बारेरी पाङ्सी
एनीगदेसे आँट याङ्गै भिसी हिन्ना।*
^९थेदेन छ्याम ओनेसिमसएनोन खबान
मुला। डन्से विश्वास लखम्बा सेम
निबा आले ओनेसिमस चा एनीगदेनोन
म्हि हिन्ना। एनीगदेदा डन्ना बारेरी
थेन्से जम्मान ताम पाङ्गला।*

^{१०}डादेन छ्यामनोन भ्याल्खानरी
मुबा हो आरिस्तार्खससे एनीगदेदा
फ्याफुल्ला भिसी पाङ्बा मुला। ओच्छे
बारनाबासला कोन मर्कूससेनोन
एनीगदेदा फ्याफुल्ला भिसी पाङ्बा
मुला। मर्कूस एनीगदे मुबा ग्लारी खजी
भिसम एनीगदेसे थेदा मान लतो:ला
भिबा ताम था याङ्सी जिन्बा मुला।*
^{११}युस्तस भिबा येशूसेनोन एनीगदेदा
फ्याफुल्ला भिसी पाङ्बा मुला। यहूदी
विश्वासीगदे न्हडला चु सोमसे जे
परमेश्वरला यहुलसाला समाचार थे:ना

३:२५ व्यव १०:१७; एफि ६:६ ४:१ एफि ६:६ ४:५ एफि ५:१६

४:७ मुल २०:४; २ तिमो ४:१२ ४:७-८ एफि ६:२१-२२ ४:६ फिले १०-१२

४:१० मुल १६:२६; २७:२; फिले २४; मुल १२:१२, २५; १३:१३; १५:३७-३८

लबारी डादेन छ्याम गे लबा मुला।
चु सोमसे लमान डाइ ल्हानान भड
याङ्बा मुला।

१२ थेहङ् लसीन प्रभु ख्रीष्ट येशूला गे
लबा एनीगदेला आले इपाफ्राससेनोन
एनीगदेदा फ्याफुल्ला भिसी पाङ्बा
मुला। एनीगदेसे परमेश्वरसे म्हन्बा
जम्मान ताम घोसी विश्वासरी पाकोदेन
दुक्क तसी चिबारी खम्गै भिसी थेसे
सदन एनीगदेला लागिरी प्रार्थना लबा
मुला।* १३ थेसे लाउडिकिया भिबा
शहरदेन हिरापोलिस भिबा शहररी
मुबागदेला लागिरी ओच्छे एनीगदेला
लागिरी ल्हानान दुख लसी गे लबा
मुला भिबा ताम डाइ प्राङ्बा मुला।

१४ थेहङ् लसी डन्ना सेम निबा
आले डाक्टर लूकादेन डेमाससेनोन
एनीगदेदा फ्याफुल्ला भिसी
पाङ्बा मुला।* १५ लाउडिकिया भिबा

शहरला विश्वासी ज्योज्यो आले
नाना आडागदेदेन नुम्फास भिबा
मिडम्हेमेदा ओच्छे थेला दिमरी
मुबा मण्डलीदाएनोन डाइ फ्याफुल्ला
मुला भिसी पाङ्सी पिन्गो।

१६ चु चिठी एनीगदेसे पढब लसी
जिन्माहेन्से लाउडिकिया भिबा शहररी
मुबा मण्डलीदाएनोन पढब लपुङ्गो।
ओच्छे लाउडिकियारी डाइ पुइबा
चिठीएनोन एनीगदेसे पढब लउ।
१७ ओच्छे “प्रभुसे एदा पिन्बा गे पूरा
लनोन तोःला” भिसी अर्खिप्पसदा
पाङ्गो।*

१८ एनीगदे जम्मादान फ्याफुल्ला
भिसी डा पावलसेन भिबा हिन्ना।
ओच्छे डा भ्याल्खानरी मुला भिबा
ताम एनीगदेसे थाम्लेःगो। एनीगदेदेन
छ्याम परमेश्वरला दयामाया सदन
तगै।